



後684.5500

3895

子

先恭勤公年譜卷三

男  
彬  
桐  
恭  
輯

咸豐元年辛亥六十五歲

正月疏請於屏山縣設立專營 馬邊屏山等  
縣逼近夷巢夷匪乘機搶掠居民苦之府君到  
任後疊飭地方文武遴選兵勇爲游兵於邊界  
要隘輪流巡緝並勸諭居民多築碉堡教練丁  
壯以自衛上年秋七月夷匪出巢至馬邊廳屬  
楊家溝雙石橋龍池困牛石屏山縣屬牛保扛

碓窩坪銅鑊寺等處窺伺官兵奮擊先後斃夷  
匪一百數十名斬取首級十一顆生擒夷匪四  
名受創後仍在屏山一帶奔竄九月屏山壯勇  
遇夷匪於沖天礮山頂復轟斃夷匪三十餘人  
受傷者不計其數餘匪逃逸旋有猓夷在老君  
山二雁坪樹林內分藏官兵直前勦捕夷匪出  
林迎拒我兵槍礮齊施轟斃夷匪數十名餘匪  
復入深林藏匿維時提督蘇布通額親往屏山  
會集官兵復上二雁坪捕擊夷匪不能抵敵四

竄奔逃我兵節節追勦或分或合先後夾擊斃  
匪甚夥餘匪悉遁回巢府君以夷性靡常每於  
秋後春初出巢肆搶屏山汛兵僅十餘名難資  
堵擊臨時檄調緩不濟急擬於峩邊鎮遣普安  
左右安阜及馬邊各營內酌抽兵練三百名配  
帶軍械揀弁管帶前赴屏山一有夷警卽相機  
堵擊無事則爲游兵逐日巡邏俟地方安堵至  
來年二月撤回歸伍奏明得

旨允行旋因夷匪分股復出游兵不敷堵禦又調赤水

全譜  
卷三  
等營兵三百名派員管帶馳往協剿夷匪復遁  
府君慮邊患之未已也乃籌立營移兵之策奏  
言屏山縣屢遭夷患前因剿辦不能得力至道  
光十九年改而辦防於縣屬茨竹坪場外設立  
萬全營乃十餘年來夷匪擾害仍復連年不息  
且與屏山毗連之犍爲樂山兩縣邊界亦聞被  
擾推原其故實因縣屬幅幘遼闊夷匪處處可  
入原設兵練除防守營汎外不敷分遣若調派  
外營之兵緩不濟急該夷匪故得肆其鴟張毫

無畏懼上年秋夷匪出巢臣因厯稽成案每當  
秋收之際及新正前後卽有夷匪出巢之事遂  
商明酌抽兵練相機堵擊詎意此堵彼竄兵練  
不敷剿禦當卽添調營兵協力堵擊夷匪現復  
退遁若一經撤兵勢必乘隙復至然使各兵日  
久駐防無論經費浩繁無所底止卽前調游兵  
其本營亦係夷疆重地皆有防夷之責未便置  
彼顧此臣等再四熟商惟有於縣屬另設專營  
移駐都司一員千把外委額外共八員兵丁六

百名遇有夷警可以就近分派堵擊不必別調外兵其所需都司一員查有永甯縣屬之建武營駐劄興文縣地方該處地僻事簡素常安靜擬將該都司移駐屏山歸馬邊協管轄作爲三年邊俸題調要缺所遺建武營應改爲守備缺查有同屬之赤水營守備駐劄永甯縣赤水地方該處民情淳樸事務更簡擬將該守備移駐建武作爲建武營守備其赤水營擬改爲赤水汛由永甯營撥千總一員往駐其於弁兵均於

腹地事簡營分照數裁撥攤抽如此量爲移置在通省糧額並無增益而於邊疆地方實有裨益如蒙

俞允

臣

等卽次第舉行至安營處所必須地當扼要

臣

已派員馳赴屏山會勘此外若修築碉堡團

練丁壯尤爲防夷要務經

臣

節次檄飭馬邊屏

山各廳縣勸諭辦理一年之內惟犍爲一縣修築二百數十處爲數最多樂山縣亦擇要修舉堪資保衛屏山縣地瘠民貧興辦不易一聞夷

警相率奔逃遂至被夷搶掠現委辦理碉堡有效之候補知縣李岳齡前往屏山會同該縣周歷察看於要隘處所勸諭紳民量力捐修如果民捐不敷應用再行由官資助務期工程堅固可垂久遠所有修建衙署兵房製造礮位一切用項均由外籌款辦理仍令居民挑選丁壯認真團練勤習武事以濟兵力之不及果能碉堡相望兵團互濟則民心安固隨處皆有守禦之人夷匪出必受創邊圉可期永臻安靖疏入

上下其議行

奏請以 不孝彬 留任所幫辦家務得

旨允從

疏濬西昌城南民田籌款代納糧稅 西昌城南有穹海在前朝時地陷成巨浸方數百里水無疏洩之路海之南有山曰雪山樹木蔭翳下臨穹海乾隆年間制府某見山勢宏敞林木高大並利此山可耕以爲田遂盡伐其木民亦利樹本可薪也日掘土以伐其根蜀多陰雨土隨

溜下注於海海底逐年墊高水不能旁趨因浸  
民田向來本地兵精皆出於糧戶田被水浸糧  
無所出多有鬻子女以輸糧者海水日廣民生  
日蹙府君憫之維時倡屬勸捐西昌工賑官紳  
踊躍已收銀十萬餘兩除濟工賑外仍有贏餘  
遂提支銀二萬餘兩飭成都華陽兩邑宰置田  
歲可得租銀八百餘兩凡穹海有糧無田者代  
其輸納立案於督藩各署及甯遠府縣以垂久  
遠復委員勘海旁地勢疏濬水路自本年正月

興辦至明年春濱海民田漸漸涸復矣

立慈幼堂一所收養稚幼子女一如重慶舊章  
奉

命查閱四川營伍

堂兄相蒙

恩簡授浙江衢州府知府

三月奏揀精兵一千派赴廣西軍營得

旨報聞

奏川省現辦保甲大概情形 略言川省咽喉

從前百十成羣橫行搶劫捉人勒贖大爲閭閻之害省城迤南之雙流新津邛州名山等處又有棒匪名色專在道途以搜查煙泥爲由搶掠行李貲財行旅胥有戒心此皆由保甲不行無可察詰故該匪等得以肆行無忌臣到任後熟思審處欲除其害必清其源惟有力行保甲實爲除莠安良之要務而奉行不善又致百弊叢生其時訪有華陽縣知縣李卿穀前在金堂縣任內辦理保甲極爲妥善境內肅清遂取其所

定規條通飭各屬因地制宜一律依法編聯辦理務期里無遺戶戶不藏奸臣復思安良固以保甲爲先而除莠必以緝捕爲要兩不偏廢始能有濟第差派弁兵懸賞購緝非經費不行藩庫又無閒款可籌臣隨與司道首先倡捐並劄飭各屬裁減浮費量力捐貲歲可捐銀二萬兩解存司庫以備應用一面嚴飭地方文武認真緝捕儻有咽匪而不克指日就擒有案犯而不能刻期破獲定將該管州縣及營汛員弁撤任

嚴參若訪有兵役庇縱等情立即嚴提究辦且因訪聞各營汛除正額兵丁之外尙有餘丁海查名色若輩既無應食糧餉勢必遇事生風訛詐良民或包庇匪徒暗中漁利此弊不除亦無以清匪類而綏善良當經劄飭各營汛將所設海查餘丁盡數裁革永遠不許復設並責成該管鎮將嚴密稽查如敢陽奉陰違仍復濫行招設卽據實稟揭參懲年餘以來匪徒斂戢視從前較爲安靜捐備經費一項竟未支用卽有尋

常盜犯無不立時破獲至川省幅幘遼闊跬步皆山煙戶零星散處並非聚族而居編聯保甲驟難蒞事各屬陸續具報間有規條未盡得宜飭令該地方官另行斟酌周妥更正辦理惟是法積久而弊生全貴稽查之嚴密臣現飭各廳州縣留心體察如甲長保正不得其人或藉此斂錢擾民或知情窩留盜匪牌保徇隱不舉卽行拘究俾知儆戒其地方官奉行之勤惰則飭該管道府隨時訪察據實具報如地方官始勤

終怠奉行不力亦卽指名揭參不准稍有瞻徇  
臣亦不時嚴密查訪地方官罔敢用其欺飾庶  
良法不致視爲具文得

旨辦理大概情形及各處章程著開單具奏欽此

四月成都將軍奕公湘到川府君卸成都將軍  
任

奏揀軍督提三標精兵一千名委副將劉長清  
統帶赴廣西軍營復調城守各營兵一千名同  
赴粵營候遣得

旨報聞

奏飭沿江州縣籌買倉米五千石運至湖南轉  
送廣西軍營又碾倉米五千石裝載運楚備用  
得

旨報聞

五月籌撥軍需銀七萬兩解赴廣西得

旨報聞

奏揀漢屯官兵一千四百名派副將和福參將  
巴彥布游擊穆騰額管帶赴廣西軍營候調得

旨報聞

六月疏陳保甲章程 略言川省地方遼闊人雜五方兼以鹽煤銅鉛各廠丁夫蟻聚良莠不齊水次則有舟楫往來西南一隅又與夷地接壤漢夷錯雜聯貫殊為不易稽查更慮難周是慎選保正甲長牌頭以分寄耳目明定賞罰為第一要務臣訪知金堂縣辦理保甲著有成效皆由於保正牌甲之得人當即通飭各屬仿照辦理並自撰簡明告示曉諭居民嗣據各屬各就地方情形斟酌損益議定條規謹擇其不相重複者共三十二條開單敬呈

御覽

一舉行保甲先應慎選保正為一鄉表率由地方紳糧選擇方正公明素洽眾望者公舉充當平時教誡保內人等各以勤儉安分為本每月朔望保正親赴各場公所宣講

聖諭廣訓以廣教化如有不能自講者准其另請讀書明理之人代為宣講 一甲長牌頭不得其人

則百弊叢生應責成保正慎選公正勤謹者報官驗明承充所擬非人卽令另舉承充之後如有不法許居民告官革除並治保正以濫保之罪其紳衿有勢力者不准充當甲長免致恃符武斷滋生事端 一編聯之法以十戶爲一牌設一牌頭十牌爲一甲設一甲長十甲爲一保設一保正戶屬於牌牌繫於甲甲統於保相地之遠近戶之疏密分段編聯不可相離太遠以致呼應不靈其不及十甲或過十甲者就近統

歸一保正稽查有居住本鄉而糧名遠在別鄉者概就本戶居住之處編聯若本戶未嘗在此居住僅有糧戶姓名在此者毋庸編入至牌內花戶責成保正甲長牌頭出具稽查認結備案 一門牌遵照舊式刷印傳集各牌頭甲長保正到案按照戶數當堂給發飭令領回分給各花戶將姓名年歲丁口數目及作何生理或己田或佃田或己房或佃房并奴僕雇工招主隣佑地名逐一填寫牌內懸挂門首卽須出外一

二月不能回家者則註明所往有外客至一二月不能轉去者則註明所來以便稽查 一編聯保甲無論舉貢生監卽曾經出仕巨家大族及一應在官人役官吏差役營兵俱一體編聯營兵則查明姓名及在何營食糧據實添註甲簿由地方官移知營汛查對明晰移覆備案書役則註明在何衙門供役以便查考其兩邑交界處所儻有隣封差役居住本邑地方亦一概註明移查確實回文備案 一甲內客店棧房

除給門牌之外令其各立號簿一本凡有每日往來投宿客商姓名人數作何生理往來何處登記明白責令牌頭甲長保正隨時稽查如有容留來歷不明之人住宿者許指名具稟拘案究辦 一甲內菴觀寺院祠廟住持僧道看寺人等不許容留族人在彼寄寓如遇有投宿化齋朝山游方僧道務須查驗牌單問明來歷方許招留歇宿儻形蹤詭秘言語支吾者立卽投明牌甲盤獲送究如果知情徇隱匿不舉報併

治其罪 一巖頭溪脚箐腹山腰零星散處之民良莠不齊遷移靡定最易藏垢納污勢難比戶編牌惟有酌量變通改爲堡練除附近場鎮在五里之內者仍同該場一律編牌外所有山居窩遠之處准其於數里之內或二三十戶或五六十戶連爲一堡係已業者親族作保係佃業者佃主作保照舊散給門牌詳造戶冊送地方官備查儻有賊匪窩戶許堡首舉發如敢互相容隱一併究治 一鹽煤銅鉛等廠一切丁

夫半係五方雜處無家無室忽留忽散蹤迹難定鹽場責成鹽總於井竈另立戶冊每竈雇用工人若干名名下註明年貌籍貫所有各竈雇人必須在工之人認識具保方許上工如有更換卽向冊內改填再令竈戶出具不敢容留匪人切結煤與銅鉛等廠責成硎長管事一律遵照鹽廠認真辦理如有藏匿盜匪情事惟竈戶硎長是問 一鄉村僻處小路搭棚居住開設腰店之人一體編入牌內責成保正甲長留心

稽查儻有容留匪類情事查實稟究卽將住棚拆毀至娼賭爲盜賊之源巨匪常溷迹其中衙蠹土豪專食其利把持包庇處處皆然責成保正人等嚴查稟究如有通同賄庇一併嚴懲

一甲內水次往來船隻停泊馬頭責令各該處牌頭甲長保正於每日薄暮親往停船處所稽查如有言語支吾形迹可疑之人與船戶人等一併立拏送究其有零星小船停泊僻處並無行李貨物所載之人攜有兇器定係匪類卽行

拏獲送究 一甲中除著名巨匪積慣窩家立

卽稟案拏究不准編入牌甲外或有曾犯小竊及被誘被脅暫時聽從匪類隨行者若不編聯反得置身牌外肆無忌憚應於未經編聯之先將前項人等造入冊內於名字下註明不務正業字樣由地方官傳案查詢如果真心改悔准同牌人等具保一體編入作爲自新戶仍聽隣保約束有犯許保人捆送其有來歷不正同牌不肯與聯牌者附諸一牌之後作爲畸零戶由

全言 卷三  
牌頭甲長嚴加稽查如有不法卽行送官嚴究如戶內有一人曾經爲匪現已驅逐在外或羈禁在官其父兄弟實係清白良民仍一體編入不得以一人爲匪牽連全家以至皁白不分阻人向善之心若父兄聽其爲匪庇隱在家匿不告知牌衆捆送究治查出卽將父兄拘案嚴懲 一城關場市地方每多挑腳傭趁往來靡定之徒日則到處覓工夜則寄宿旅店最易藏奸必須嚴加稽查責成甲長牌頭於每夜二更

時赴各歇店清查如有形迹可疑之人立拏送究儻外閒拏獲匪徒供出在某店窩藏卽將店戶拘案治罪甲長牌頭盤獲著名巨匪卽予重賞其城鄉乞勾責成牌頭甲長另舉勾頭數人各給腰牌將衆勾姓名註明勾頭腰牌上令其管束如衆勾有爲匪不法卽將勾頭究處 一每甲設立甲簿兩本凡有甲內花戶姓名年歲丁口生業按照門牌分晰造入甲簿送地方官存查並將議立保甲章程逐款登註甲簿之首

俾各牌頭甲長保正可以隨時稽查其甲簿一本存署備查一本給甲長收存令其每逢朔望挨戶查點一次遇有增減遷徙於簿內逐一添註其遷來者查明來自何甲搬去者查明搬往何甲均分晰註明除每季將搬去者門牌繳官遷來者稟請補給外由保正按季攜帶甲簿赴地方官報明於存署簿內一律更正地方官亦照底簿造送各上司查考按年更換一次凡保內四面交界之地係與某鄉某保連界或與本

鄉某保連界係何地名冊首詳細註明保內分別東南西北皆以本鄉場鎮爲主以便稽查而免混淆至保甲應用簿冊門牌概由地方官捐廉置備當堂給發保正呈繳簿冊隨到隨投不准書吏假手延壓勒指需索滋事至書役因保甲之事承票下鄉亦由官給盤費如有需索准被索人稟明革究保正人等如敢向牌民勒索許牌民稟官重懲一地方官每日聽斷詞訟隨便詢問鄰佑係何名姓某家幾人作何事業

查與冊簿是否相符每遇因公下鄉將存署甲簿帶往順道抽查如有疏漏舛錯卽予查究更正一保正甲長牌頭各有稽查之責賞罰不嚴每多虛應故事編聯之後牌內如有匪盜窩家私鑄私宰假官假差販賣私鹽硝磺邪教訟棍妖言惑眾拜盟結會並素行豪強專平空生事魚肉鄉愚或幫人鬪毆及有現充餘丁海查等類責成保正甲長牌頭層次稽查舉報得實分別輕重獎賞如牌頭不舉發經甲長查報甲

長不舉發經保正查報卽將不舉發之牌頭甲長革究若受賄容隱計贓從嚴治罪係失於覺察亦嚴加責懲如甲長牌頭已告知保正而保正故爲徇隱許甲長牌頭徑行報官將容隱之保正嚴究實情與犯人一併從嚴治罪舉發之牌頭甲長從優獎賞儻審係挾嫌傾害亦將原報照例治罪如保正甲長牌頭自爲前項不法等事並徇庇盜匪窩家等類經該處居民舉發審實嚴行懲治居民優加獎賞如牌內有匪盜

窩家等類同牌之九戶不先行首報者分別徇縱失察治罪仍令甲長牌頭將按月稽查有無匪盜窩家等項出具切結於下月之初投遞一次至街約鄉約有稽查之責亦令協同查辦一甲內遇有命案保正甲長牌頭如非地鄰要證不必到官以省拖累差役下鄉傳喚案件不得向保正人等跟問要人該保正人等亦不得出頭攔阻保正人等如拏獲賊匪窩家供出寄贓銷贓之人確實查明果係知情寄銷一併送

究如係實不知情將贓起出其人免送同牌人等如有挾嫌誣報附同栽害保正人等徇私妄爲及藉搜贓名色挨戶抄檢私行拷搯勒罰錢物從嚴究辦若甲內拏獲賊匪窩家逃兇等類保正查實確據立即送究每一賊止准令二人同鄉約甲長送案被獲之犯如係本屬命盜案內逃犯將拏獲之人酌量給賞如係外來逃兇逃盜加倍給賞用示鼓勵送犯到案地方官立即提訊不得稍延其送犯之人即時飭回毋使

稽留滋累 一城廂內外及鄉邨場市街巷兩頭皆須修立柵欄晝啟夜閉每家每巷十家共出一人一甲計有十人每夜以二人支巡一更卽在該甲地面往來擊柝遊巡其鄉邨居民零落亦於路口總處設立柵欄以嚴防禦或一家輪出一人或合甲公雇一人遇夜支更謹守柵欄遇有盜賊夜行及形迹可疑者卽時鳴眾協拏如更夫徇庇以致失事許保正等查實稟究一牌內居民平日稽查門戶修築牆垣隨時

檢點各戶置備銅鑼一面遇有盜賊及搶奪之事無論晝夜一經事主鳴鑼同牌同甲之戶務各協力往捕卽鄰近別甲亦卽齊聲鳴鑼接應近則截捕遠則協拏儻盜匪逃竄務須不分畛域追拏務獲送究其兩邑交界之處尤宜彼此聯絡聲勢互相接應如有聞鑼不到協拏不力者許牌頭人等指名稟究所設銅鑼惟有盜匪方准鳴擊餘事不准擊用以昭信守至擒捕盜匪時除壯丁出門救援外各戶老弱男女皆應

閉門暫避不准出外探望免中盜匪拉空挾制  
之計 一每甲選撥健足二三名如有匪徒逃  
竄入境立即赴地方官飛報一面通知牌頭甲  
長保正協同遠近各戶齊集圍拏若有外來匪  
徒攜帶兇器竄入境內牌頭甲長保正人等迅  
速鳴鑼集眾四面兜拏儻匪徒敢於恃眾拒捕  
照例格殺無論如孫小偷之輩止准拏送不得  
拘執擅殺 一兩邑交界地方各甲內保正甲  
長每日應派牌頭輪赴交界地方巡查留心探

聽如探有匪徒在於鄰封境內經鄰近追拏即  
一面知會甲長鳴鑼集眾速赴交界各要隘處  
所嚴密守禦勿使匪徒竄入一面飛報地方官  
立刻會營前往捕拏 一各屬通衢大道雖各  
處設有哨房第相距遙遠應令巡哨兵丁於前  
後不相連屬之處常川巡察儻行旅在途匪徒  
乘機竄出攔搶巡兵一有見聞即時追拏一面  
喊投甲長鳴眾跟蹤協捕務獲送究 一甲內  
被竊之家即投明保正甲長人等看明盜蹤一

金譜 卷三  
面協力訪拏一面將被竊各賊據實開單報案  
不得以少報多以無報有致起賊掣肘 一各  
處盜劫拉搥案件必有奸人爲之綫索不可不  
防其漸甲內新招佃戶及所換雇工必須查明  
實在來歷並覓妥人擔保免致引匪入宅 一  
甲內有擺攤收荒者往往接收盜賊應責成保  
正甲長牌頭查明實係小貿貧民本分生理准  
其於城市人煙湊集處所擺設收買令其留心  
查察勿買盜賊儻有挑擔向鄉僻處所收買者

概行禁止 一帶刀游蕩川省已成積習亟宜  
嚴禁並責成各牌甲保廣爲勸收繳銷違者稟  
官拏究若甲內有本地游民外來痞棍及一切  
估討估借賣藥算命三五成羣滋生事端由牌  
頭甲長協同牌內之人稟官分別遞籍保束  
一保正甲長清查門戶分給門牌責拏盜賊是  
其專責其民間口角細故聽其排解理息以省  
訟端其有不服理論仍願經官者不許將保正  
列入爲證以免拖累至戶婚田土一應詞訟該

保正等不得從中扛扶賄和勒罰把持違者重懲 一甲內查報公事牌頭甲長告知保正隨時具稟應由地方官給保正每人稟狀五十張用完再領遇有甲中公事准用稟狀填寫邀人至署投遞不准書差需索若尋常詞狀與保甲無干者不准擅用 一與夷地接壤州縣以防禦夷匪爲首務除照條規編聯外必須實力講求團練庶一有夷警可以濟兵力之不及應以一甲爲一團一團百戶五十戶出人操演五十

戶置備鳥槍器械刀矛等類一甲可得五十人十甲可得五百人甲數多則團練亦多按月會操二次每團另舉團首一名以統之其鳥槍呈明地方官查驗編號發給備用 一附近夷疆地方間有熟夷與漢民雜處往往愚弄夷人盤剝準折恐致引惹邊衅應責成保正將內地居住年久熟夷與漢民一例編聯平日嚴加稽查如漢民有欺刻夷人情弊卽行稟官嚴究仍責成夷保人等約束熟夷不得因此反行欺壓漢

民其甫入內地居住未久之熟夷勒令夷保轉  
飭搬遷出境 一夷疆接壤處所應嚴定中外  
之界不准內地漢民典種夷人地土應責成保  
正甲長人等將內地漢民有無典種夷人地土  
出結備案儻保正人等徇庇隱匿一經發覺卽  
將本人與保正人等一併嚴懲 一漢民每有  
私入夷地藉砍柴掘筍爲名或結夥前往夷地  
開窰燒炭伐木挖礦易啟野夷搶掠之端應責  
成內地保正及該管夷保互相稽查如有前項  
私入夷地之人立卽稟官照私入夷巢例從重  
究辦得

旨所擬章程俱妥欽此

八月入文闈辦理鄉試監臨事

覆奏查明川省並無著名教目 先是有人奏  
四川綦江縣教目馬武成僞稱赤地大王傳教  
貽害地方

上命嚴密訪拏府君密委知縣李漸鴻易裝潛往綦江  
徧訪并無其居民亦不知有不法名號據實

奏

聞得

旨隨時密訪不可擾累閭閻諒汝亦必能妥辦也欽此  
奏請暫留升任臬司呂佺孫俟新任臬司蘇敬  
衡到川再令交卸免輾轉交代之煩

上是之

奏陳查辦西昌地震災務工賑事竣地方安靜  
請獎捐輸經費及在事出力官紳得

旨敘建昌道劉裕鈇等官有差並以府君倡捐經費

敕部議敘

奏修濬穹海涸復民田籌補兵精動支西昌工  
賑經費項下銀兩得

旨報聞

覆奏鹽務事宜 上年疏陳鹽務積弊酌擬補  
欠杜虧章程戶部逐一覈議

上命就部中指詢各情詳晰熟議至是奏言整理鹽務  
原爲裕課起見滯引旣爲籌撥積欠必令有著  
自當量商人之身家代籌彌補重責成於州縣

以嚴催徵庶不至徒託空言無益實濟如部議  
成都華陽榮縣犍爲富順五縣邊計各商代行  
犍爲並增行宣恩馬邊珙縣三台射洪蓬溪中  
江鹽亭各廳縣邊計水路滯引彌補積欠是否  
身家殷實力能清完不至藉口代銷帶課仍屬  
紙上空談一節查上年查辦時曾經委員分途  
查訪各屬商人中惟成都華陽兩縣計商及犍  
爲榮縣富順等縣邊商較爲殷實銷岸亦甚暢  
行是以將犍爲並增行宣恩馬邊珙縣三台射

洪蓬溪中江鹽亭各處道光二十八年以前水  
陸滯引並三台等縣二十九年分水引又犍爲  
縣增行宣恩二十九三十兩年分水引分撥代  
銷認補各年欠解稅羨截銀該商等稅從引出  
岸暢則引易行引銷則稅易完兼屬殷實之商  
更不難按限清款且撥引認欠均係傳到該商  
等詢明各能代引若干認欠若干出於願意方  
予准行並無絲毫勉強似無慮其藉口代銷帶  
課延不完繳又如所議限期太寬將來事隔多

年漸成延宕作何歸結是否責成州縣督銷督  
徵隨同正課分別議處議敘以及每年實在帶  
完銀若干兩均未切實聲敘湖北咸豐來鳳兩  
縣及瀘州酉陽黔江彭水秀山開縣宜賓等州  
縣並邛州各處商人係銷本商之積引補本商  
之積欠應卽趕緊完交何至展限十二年之久  
難保非搪塞目前豫爲拖延地步健爲增行湖  
北宣恩水引一百五十張旣係查明無商領行  
引稅虛懸自應設法招募妥爲籌補何得遽請

停給且前款滯引已有成華兩縣商人代銷則  
此項水引一百五十張何不併令認代一節查  
成華等五縣商人雖力較充裕然各有額行引  
稅自當寬予限期俾商力稍紓庶得從容完解  
縱爲日稍久而於事可期有濟其自領滯引帶  
完積欠之湖北咸豐來鳳兩縣及瀘州酉陽黔  
江彭水秀山開縣宜賓同無引帶完積欠之邛  
州等處商人所行口岸鹽務雖有起色而該商  
等各名下每年有應完之額引稅羨以先俱係

積年拖延現在責令年清年款若再將積欠令其趕緊完交體察情形實屬力有不逮應仍請照前議俱予展限十二年以歸畫一而示體恤所有各商代銷帶徵課稅羨截銀兩繳引數目俱經由鹽茶道按限算明每年實應完繳若干札飭各州縣取具各商甘結申賚在卷此皆斟酌情形不能不請展緩事經查辦亦斷不能任令該商等搪塞拖欠至健爲增行宣恩縣水引一百五十張前於成華兩縣商人認代滯引本

飭令將前項額引一併代行該商等因已領滯引恐再加額引一時行銷不及有誤稅羨不敢承認又無別處商人可撥故詳請停給不發茲遵部議復經該道傳該商等到案詢據稟稱所領滯引已試行數月因鹽務整飭之後私斂官暢引不敷食尙可增認等情當卽撥定成都縣商永遠分認引六十張完稅羨截銀四百零二兩華陽縣商永遠分認引九十張完稅羨截銀六百零三兩自咸豐元年爲始行引完稅以上

各代商本商補欠及成華商人分認引稅俱係  
責成該州縣督銷督徵嗣後辦理奏銷參案時  
卽請將前項引銀隨同各州縣額引稅羨另立  
一款查明已未完繳分別議敘議處使之責無  
旁貸以免玩泄從事又如所議清單內稱川省  
引張悉交陝賈代辦豈川省無一運商憑何招  
充有無保結一節查清單內陝賈代行等語並  
非川省無一運商蓋陝民在川貿易者眾川商  
之引皆係陝民幫同辦運名爲代辦實係商夥

如正商一時乏本配鹽該陝民多有出貲助銷  
藉分利息其稅羨仍係正商自行完解於川省  
鹽務有益無損向不查取保結事既歷久相安  
應聽其便又如所議殘引奏銷後勒限一年催  
繳解部爲期已寬豈容再任逾限若謂逾限卽  
爲廢紙僅責成廠關各員扣留申繳勢必扶同  
弊混應令嗣後奏銷報完後准於一年內將殘  
引悉數解部查銷儻逾限不繳卽查取各職名  
分別議處一節查川省向例於奏銷報完後扣

限一年全行催繳屆限如有不繳即將催繳之  
地方官及督催道員照例參處本年奏銷鹽茶  
引目業經查明開送嗣後仍照常辦理又如所  
議從前冗費既未獲有實據則此後更復從何  
覺察所謂冗費概行裁除者亦僅託之空言恐  
仍未免視爲利藪且冗費除廠關書巡外其文  
武大小衙門官吏該督何未計及一節查裁除  
冗費一層上年業經細加訪察文武大小各衙  
門向無索取規費情事惟廠關書巡勒索賄縱

既於鹽引有礙而每引取銀數錢積少成多大  
爲商人之累當經裁革一面示禁在案然奸胥  
猾吏難保不別開需索之門現又出示曉諭如  
有復踵故轍及另設別項名目或各衙門有未  
經查出之款許商人據實呈明以憑裁除淨盡  
嚴懲參處仍不時明查暗訪有犯必懲總期不  
留絲毫弊竇其餘照准各條均經分飭照辦現  
在新章甫定必當實力循行藉圖整頓當稽查  
者認真稽查當甄別者隨時甄別當懲辦者據

實懲辦以冀官吏交警引銷課裕

上下其議行

覆奏茶務事宜 上年查辦茶務積弊疏內經  
戶部覈議指詢各節

上命查覆至是奏言川省額設邊引九萬二千三百二  
十七道原行松鑪兩岸內成都華陽彭縣崇甯  
灌縣新津什邡廣元江津平武石泉丹陵大邑  
合江安縣綿州茂州汶川十八州縣商人分引  
一萬八千八百九十四道運赴松潘廳行銷鑪

岸邊引除雍正乾隆年間陸續由雅安名山榮  
經三縣額引內撥出一百二十九道改行腹地  
溫江南川開縣江油清溪峩眉鹽亭中江八縣  
外尚有七萬三千三百零四道係邛州雅安名  
山榮經四州縣商人承領與天全州商人所領  
土引二萬二千一百一十一道共岸行銷歷年  
松岸邊商向不認代惟鑪岸邊商代行各屬腹  
商將引推出者不但成都等二十州縣卽專行  
腹引之處亦有此弊揆厥由來係因腹商內引

全譜 卷三 三  
數較多之丹陵等縣口岸難銷年年引目積滯  
勢不能不推邊行銷藉顧稅羨因而奸商亦將  
已行之引捏稱未行與邊商勾串朦混推代重  
照影射貽害邊岸現經遵照部示將邊土腹各  
引給發之時一律分別填註商人姓名及行銷  
處所繳殘限期俾各地方官有所稽查藉杜朦  
混請改之弊又如部議設立商總能否兼顧一  
節查打箭鑪之議請設埠另立商總稽察者蓋  
緣行松岸引茶早年已於汶川茂州松潘等廳

州縣各商捐貲設有關隘公舉妥練商總赴關  
協同書役巡查如有私茶卽赴地方官稟究層  
層盤驗無弊可作稅羨年清年款而鑪岸引茶  
該商採配之後雖早年亦議令赴瀘定橋巡檢  
打箭鑪同知各衙門挂驗放行究不如松岸逐  
處有商役交查之周至難保無賄串書役縱私  
情事且天全州又有捷路徑赴打箭鑪可以不  
遵運道從瀘定橋經過私茶更易於偷漏因之  
正岸充塞各商受累滋甚上年委員前往查辦

督商議請於附近打箭鑪地方設立總埠各州縣商人隨時各舉商總一名常川駐彼會查則天全捷徑可以截阻遇有引茶經過由該商總等盤驗一次如查出私帶腹引重照影射以及無引私茶就近赴打箭鑪同知衙門稟究詳辦查無前項等弊即將引包斤數註明運赴打箭鑪具報復由該同知查驗相符然後放行儻有不符卽提該商總等訊追嚴懲等情當因打箭鑪係邛州等五州縣專岸該商總等亦各有與

同商額行之引若放一處私茶卽礙眾商引課彼此自不能不嚴查互察且有廳員復驗亦不敢扶同作弊卽先經過之瀘定橋知前途稽查嚴密書役更不敢受賄縱放與松岸稽查之法大同小異於茶務可期有益固屬多一經手之人其實仍藉地方官爲糾察雖於腹商之捏報停滯不能兼顧而於邊岸之代腹行私實可遏除此鑪岸所以必須設埠商查况腹引旣不准推邊引張又酌量分派腹商亦再不能藉口停

全譜 卷三  
滯握殘不繳捏請改邊作弊若松岸茶斤與此  
埠無涉並不由該商總等查報又如部議馱運  
致累並未籌畫招徠一節查馱運致累之故向  
來鑪岸茶包俱係牛隻馱運前因迭年牛多疫  
斃雇夫背送用費浩繁虧折滋多現經查明牛  
疫已息孳生漸繁並飭據各商公同出貲另養  
馬匹閒搭馱運以後可無慮此卽毋庸再爲籌  
畫招徠又如部議腹引按缺分派有無科派調  
劑其徵還未完羨截期限過寬一節查腹引一

項不但各屬道數多寡懸殊其行茶口岸亦多  
寡不一卽以富順一處而論洪雅商人行銷而  
名山樂山峨眉合江等縣商人亦准銷售其餘  
大都類是焉得不互相攙害而議敘議處又僅  
責成招商徵課之地方官銷茶之地方官不與  
焉亦未免各存膜視私茶更乘閒充斥所以腹  
引各商無不賠累上年議請均勻分派飭令該  
廳州縣查照引數各招募本地殷實糧民或一  
二名或二三名領引完稅或舊商仍願充當亦

全譜  
卷三  
聽其便只准在本地方銷售不准兼行別處於  
是一屬有一屬之額引一商有一商之定岸茶  
爲民間日用之需無不食茶之人卽無不易銷  
之引况戶口最繁之區僅領引二百張計所行  
之正附茶斤每年不過二萬餘斤爲數已屬不  
多以先茶引積滯由於引岸不一私茶充斥現  
在舊弊更除所有督徵督銷議敘議處又歸之  
各廳州縣責成旣專自不能不認真查緝私戢  
而官自暢銷一引可獲一引之利小民卽可藉

此以贍身家自樂於從事而無所用其科派調  
劑現在如遂甯縣新茶商領引試行未久卽恐  
民食不敷情願增引已將雅安等縣改入腹地  
之引一百二十九道撥令認行是其明徵則立  
法可期經久實係確有把握在舊商賠折日久  
一旦更易舊章以爲藉此釋累更無不同聲樂  
從查辦之時並各願將道光二十九三十等年  
新舊引稅一律繳齊所以本年奏銷內二十九  
年腹引稅羨俱已完清三十年稅羨完繳亦甚

踴躍其間有未完者均經具限於本年十月清  
款惟積欠銀三萬九千二十四兩四錢七分六  
釐俱係舊商承認取有結狀其情形與鹽務相  
同應請仍照原議展限十年隨同各州縣正額  
稅羨催解查議至部議令將鹽茶兩項羨截硃  
力各歸各案分別造銷以免淆混等語本年奏  
銷業經遵照分別造報所有新招各商俱係以  
咸豐元年爲始領引完稅各屬已將次招竣容  
俟齊全後再將某商領引若干何處採配何處

行銷造冊咨部

上下其議行

是月復兼署成都將軍任

閏八月修建陝西褒城縣天心橋 先是太夫  
人赴府君任所經過其地見山路崎嶇棧道尤  
危險有橋曰天心仰攀山嶺高幾百仞乘肩輿  
行須數十人牽引而上行人皆有畏心太夫人  
至署爲府君言欲捐修橋道以便往來行旅府  
君曰余素所念念不忘者卽興辦勿遲也遂卽

委人勘估督辦計需銀一千餘兩不一年告成  
嗣後商旅經過皆獲平穩無從前之危險矣

十月

賜御門聽政述志詩

十一月覆奏峩眉山教匪 先是有人奏湖南  
教匪充斥有紅簿黑簿結草斬草捆柴等名目  
各教總領數百人或數千人皆以四川峩眉山  
會首萬雲龍爲總目所居之處有忠義堂名號  
其傳徒皆有度牒

上命嚴密訪察究辦府君委茂州直隸州知州牛樹梅  
易服潛往進香爲名徒步上山徧歷訪察杳無  
蹤跡山寺鄉場均無其人亦無忠義堂名號覆  
奏略言該匪旣爲邪教總目自知罪不容誅必  
詭詐多方更易姓名遷移居址現嚴檄道府廳  
州抽查保甲密切查拏儻別經發覺地方官意  
存諱匿定當分別指參得

旨仍應嚴密訪察勿稍鬆懈欽此

奏拏獲習教匪犯 定遠等州縣訪獲尹倡圍

全譜 卷三  
楊癸甲等二十餘人傳習青蓮教起出經卷皆  
鄙俚常言編成禳災祈福語句供奉女像稱無  
生老母煽惑傳徒府君據實奏

聞得

旨嚴訊究辦欽此

不孝彬 來京赴禮部試 孫承熾承勳同來 長孫

承烜 留任所讀書

十二月 孫承熾以

恩詔授一品廕生

咸豐二年壬子六十六歲

正月刊春秋集說 時延沈孝廉寶錕授 孫承

烜 輩讀因世儒讀春秋每詳傳而略經遂輯

御纂春秋傳說爲家塾讀本名曰春秋集說至是刊成

頒發學宮俾士子便於誦習

二月訪獲謀叛未成首從各犯 金堂縣民人

鄭沅溢輕信星士古精力言命當極貴遂糾眾

謀劫場市踞雲頂山以叛川北道胡興仁訪聞

來省面稟府君飛檄飭捕據報先後捕獲首從

各犯提省研鞫得實梟鄭沅溢首餘犯擬如律  
奏入

下部議行

疏報屏山建營章程 先是屏山屢被夷擾府  
君籌移營駐兵之策會同提督蘇布通阿委員  
履勘距屏山縣城九十里隆華場地當適中與  
犍爲宜賓兩縣地界相連又有沐川大坪石碑  
均三處均關扼要勘定立營處所即日鳩工庀  
材未半年一律工竣計建礮樓七百二十八座

礮臺七十一座石堡十五座甄堡二十一圍土  
堡九圍牆五砦子十二並修舊礮六百有奇移  
撥千總一員把總二員外委三員額此外委二  
員兵丁六百名前往新設營汛駐防所需軍裝  
器械旂幟均於裁兵各營撥給原設建武營都  
司缺移往新汛改爲平安營都司以阜和右營  
都司蔣玉龍調補統兵駐防初夷匪連年肆擾  
居民遷徙靡定田地盡蕪民生日蹙自建礮後  
夷匪不敢出擾舊田開復十有七八民心安帖

府君據實入告並酌定章程六條 一移撥平安營千把外委額外外委八員應於存營安設千總外委額外外委各一員沐川汛安設把總一員大坪汛安設外委一員石碑均汛安設額外外委一員屏山汛原設千總今改安把總一員其原設千總兵丁撤回萬全本營操防石角汛原設把總兵丁撤回馬邊專理存城營西甯汛事務以上所需千總一員以阜和左營噶達汛千總撥往所遺噶達汛務由阜和協在該營

把總內酌撥一員駐防所需把總二員於松潘中營把總內酌撥一員平番營把總內酌撥一員所需外委三員於松潘中左二營內酌撥二員懋功營酌撥一員所需額外外委二員於川北右營永甯營各裁撥一員所撥各弁內有現在駐臺未滿並業經病故及與平安營地方不甚相宜者分別揀弁調拔另行報部辦理 一移撥平安營馬戰守兵六百名均於腹地事簡營分均勻裁撥馬兵二十四名戰兵二百三十

全譜 卷三  
七名守兵三百三十九名以上兵丁若將現兵撥往非惟該兵等願戀家口有願往不願往之分且於邊地一時不能熟悉若盡由新營招募又於營規技藝未諳遇有夷警難期得力是以悉將糧缺撥往令平安營募捕守糧一百二十五分其餘馬戰守糧四百七十五分派令峩邊普安馬邊各營拔募卽在各該營原額制兵內照糧抽選精壯兵丁撥往平安營分布以符六百名之數各營拔募之兵卽補抽撥各兵所遺

之額且峩邊等營與平安營情形相似撥往之兵登山陟險亦所習慣於營伍操防均無窒礙各兵內分撥沐川汛兵丁一百名大坪汛兵丁七十名石碑均汛兵丁二十名屏山汛兵丁四十名石角汛兵丁四十名餘兵三百三十名駐紮平安營其隆華場東南之冠英場西南之中都場菜麻地馬牙石西北之乾欠口捲銅橋等處俱係要地均各安設塘遞派兵駐守俾歸周密 一平安營修建堡城一道計三百一十二

丈每丈高九尺加垛口四尺共高一丈三尺下  
厚八尺上厚六尺城門三道礮臺一座存城都  
司衙署一所千總衙署一所外委住房一所額  
外外委住房一所火藥局三間庫房七間倉廩  
六間兵房三百零六間校場內將臺一座月臺  
一座抱廳三間演武廳三間碓房六間石碑均  
額外外委住房一所兵房十二間大坪外委住  
房一所兵房五十七間礮臺一座沐川把總衙  
署一所兵房五十九間 一平安營官弁現飭

議定章程日期每月輪派帶兵出隊與毗連營  
汛會哨巡查以聯聲勢而揚兵威按月將會哨  
官兵銜名報查所有營汛兵丁責令該營都司  
督率營汛各弁帶領各兵將槍礮刀箭各技及  
縱跳爬山等事按日輪流練習期其純熟趨捷  
並令明白開導曉以紀律使之有勇知方其弓  
箭兵丁亦令兼習鳥槍並由省撥給長矛行令  
帶習務須精益求精咸成勁旅仍依照舊章每  
年春夏之交由永甯道前往巡查一次秋冬之

交由提督前往巡查一次將該營汛弁丁分別  
抽查較演儻兵技不精軍實不齊有糧無兵器  
械短缺而不堅利鮮明皆由營汛員弁怠玩廢  
弛所致立即據實指參以示懲戒如此有過必  
罰則操防認真夷匪無隙可乘自不能如從前  
之肆擾而設營可收實效若遇換防臺藏該營  
之兵應免其撥換以實操防 一平安營地處  
邊陲防夷責重該營都司既設邊俸其存城干  
總情無二致應請亦定爲邊俸三年俾資鼓勵

如該員弁等三年中果能撫戢得宜操防不懈  
夷匪斂懾屬境乂安卽行保題升用儻因防範  
不嚴被夷匪竄入不能立時撲滅復致擾害地  
方隨時參辦其分防各弁亦以地方之是否安  
靜定巡防之勤惰分別事之輕重以示懲獎庶  
人人思奮邊防可日就嚴固至該營係爲防夷  
而設毗連各營汛不得藉此推諉觀望嗣後無  
論何營何汛探有夷匪出巢信息卽須派帶弁  
兵奮勇邀截並互相知會併力捕擒使夷匪出

必受創退無所得始可戢其頑心如敢坐視遷延致誤事機卽從重指參以儆效尤其平安營所管境界及分防各汛地段飭令逐一勘明畫清界址另行造冊送部將來遞解人犯經過卽由該營汛撥兵護送遇有疏防盜劫等案卽以該管汛弁開參以專責成一該營雖重操防而查拏漢奸亦關緊要夷匪若無漢奸道路不熟焉敢糾眾肆出已飭該管文武廣爲曉諭禁止漢人不得私入夷巢並於通達夷地隘口小

路設卡稽查如有漢人出入卽將其人拏獲由文員嚴訊若係被擄漢民私逃出巢有家可歸有人可保者立卽保釋外餘皆治以應得之罪至於民間團練更爲禦夷要務兵力不能無處不到而團練實係隨在可行大團數百人小團百人或數十人擇其年力精壯者教以武事使之勤加練習遇有夷警鳴鑼爲號一團鳴鑼則眾團皆鳴頃刻之間可周四境一團有警則眾團應援人眾勢厚彼勞我逸與戰則已操勝勢

若不戰而守則礮堡如林更有恃而不恐俟官  
兵至卽協力撲擊夷匪雖兇頑不難大加懲創  
但小民難於謀始前經委員前往勸諭並令地  
方文武獎勸誘掖剴切開導使其忻然樂從如  
能舉辦數處行之有效則民間彼此效法漸行  
漸廣不勞督飭自無不認真團練邊地可以永  
靖惟是屏山縣地方清苦儻有差派弁兵防捕  
之事盤費賞需等項費無所出溯查馬邊雷波  
峩邊越嶲四廳文武皆係自本省總督以下各

官捐貲酌量津貼經前督臣鄂山等奏明有案  
今屏山縣平安營文武事同一律亦擬由各官  
捐給經費俾得辦公有資遇事不至束手坐困  
而於地方亦不無裨益

上下所司議行

以粵西軍需孔亟捐銀一萬兩助餉

賞戴花翎

三月出省閱川北川東營伍 府君守重慶時  
廉慎自矢教養兼施刊發有益之書頒布學宮

士習日新雖商賈亦皆聞風向善有出貲刊印  
輾轉運至他省施送者彼土人士又重鑄之川  
東紳民感頌不衰至是府君閱伍甫入境父老  
紳民焚香遮道數十里相屬不絕川東道曹君  
澍鍾有詩紀其事

四月閱建昌松潘等鎮營伍事畢回省

不孝桐 散館一等授職編修

五月刊春秋釋奠儀制錄 府君履任後值上  
丁行釋奠禮見儀物不備慨然思修復之聞南

部徐公暢達精制作延聘至省徧考會典通禮  
通考諸書鳩工梓鑄凡形名器數靡不殫究至  
當並爲籌經費定規條以垂永久禮器樂律舞  
譜及行禮儀節皆繪爲圖名曰春秋釋奠儀制  
錄刊成頒發學宮飭有司敬謹遵行  
奏揀精兵二千名派馬邊協副將瑞格統領前  
赴湖南候遣得

旨報聞

籌議民捐銀三十萬兩以二十萬兩委員解赴

廣西軍營以十萬兩爲本省臺費其不敷銀請以續收民捐銀兩撥支其鄰省應撥濟本省臺費銀三十萬兩請撥解廣西以資軍餉

上下部議行

奏挑綠營兵一千名派署維州協副將西林統領挑屯兵一千名派建昌中營游擊張萬林統領豫備調撥得

旨報聞

密陳川省綠營存兵無多湖南戒嚴川省酉陽

州一帶與湖南毗連尤宜未雨綢繆得

旨留覽欽此

六月奏請

陛見得

旨著來見欽此

七月奏陳川省無款可汰請酌改駐防臺藏官兵更換年分 先是御史吳若準以經費不敷請令各直省督撫各就地方情形斟酌興自然之利汰無益之用戶部議請敕下各督撫藩司

全譜 卷三  
察看情形妥議具奏至是奏言國家貨利之源不外乎地丁錢糧鹽課關稅數大端臣督同署藩司蘇敬衡詳加體察悉心商酌川省地丁向係年清年款毫無帶欠並無可興之利鹽茶兩項臣到任後因川省引岸疲滯稅羨均多積欠而鹽羨歷年欠至二十餘萬兩之多於道光三十年間督飭鹽茶道清安泰徹底清釐將積滯引張設法撥代行銷統予限十二年帶徵彌補現在依限完納亦屬無可再議其各關稅務惟

夔鑪兩關額稅較多鑪關向以茶稅爲正宗近因口外茶不暢銷徵稅每形不足卽如該關徵報道光三十年茶稅較上年短徵正額贏餘銀三百七十二兩零經臣恭疏具題責令管關之員賠補夔關額稅歷年雖未短徵但該關向以川米廣花爲正宗其餘雜稅無幾近年兩湖豐稔米價較川米更賤而棉花一項川楚兩省價值相同商販無不折本因而裹足不前現在楚省因粵匪滋事辦理防堵夔關商船日見稀少

全譜 卷三  
關稅亦日形拮据是夔鑪兩關情形實亦無利  
可興部議所云自然之利惟有開採礦廠而利  
害已屬參半前奉

諭旨查辦曾經行據各屬查明並無出產銀礦之處  
亦無封禁未開之山已據實覆奏在案至於歲  
支文職俸廉武職俸餉米折以及屯防臺費一  
切雜項俱係年例應支必不可省之項又係減  
平支放前已遵照部咨酌裁營馬例馬共五百  
四十三匹每年已節省銀六千三百兩有零此

外惟有駐防前後藏及東西臺站官兵共一千  
五百五十二員名定例到防後扣滿三年另派  
弁兵前往更換一次推原三年一換之由蓋因  
邊地苦寒水土惡劣官兵久戍情殊可憫且化  
外番民梗頑成性各官兵相與眾處轉恐日久  
生玩原所以示體恤而昭慎重今則該番民等  
歸化日久懷德畏威莫不帖服該駐防官兵例  
得於應食糧銀外另行支給口糧一聞派赴臺  
藏無不踴躍前往並不以邊地苦寒稍形畏縮

且在臺每屆換班之時有告懇再留一班之事是今昔情形迥不相侔而臺藏駐防官兵每屆三年更換由川至藏並由藏回川各官兵支領行裝馱馬鞍屨口糧等項每次共需銀五萬四千九百餘兩實屬爲費不貲該官兵到防之後凡地方之險易番情之澆淳一時不能諳悉及至甫經熟悉又已三年期滿更易新兵一切控制事宜驟難周知徒覺多費帑金於邊防仍無裨益伏查甘肅新疆伊犁等處駐防官兵例應五年更換一次川省臺藏與新疆情形大略相同所有駐防臺藏官兵應請援照新疆之例亦改爲五年更換一次仍照向例分爲頭二次換班如此量爲變通以十五年計之只須更換三次較之舊例三年更換一次可節省兩次換防銀一十萬零九千八百餘兩洵於經費邊防兩有裨益

上敕部議行

八月入文闈辦理鄉試監臨事

九月拏辦謀叛首從各犯 酉陽州匪徒梅倡  
 名糾約黔匪冉祖興等搶劫沿河鹽店豎旗滋  
 事經重慶鎮阜陞川東道曹澍鍾緝獲首從各  
 犯訊明就地正法奏入得

旨報聞

十一月入

觀

召對五次

垂詢邊事甚詳

陛辭日府君力陳耳疾難膺繁劇恐誤辦公

上溫語慰勉不數日遂奉留京之

命

十二月授禮部尙書

賜紫禁城騎馬

遵

旨覆覈刑部堂司各官處分 先是刑部員外郎徐文

藻承審佟馬氏呈送忤逆重情書吏藉端詐贓

案關堂司處分

上命府君偕兵部尙書魏公元烺覆覈至是奏員外郎  
徐文藻承審重案旣經訊無其事不卽交旗辦  
理致書吏藉端索詐郎中多山失察書吏詐贓  
應請分別嚴議議處標畫傳片之堂官並查取  
職名議處

詔如所議行

